

Profi ar gyfer trichinella mewn moch

Sut y mae'n rhaid profi moch ar gyfer trichinella cyn iddynt fynd i'r gadwyn fwyd.

Mae'n rhaid profi pob mochyn bridio (hychod a baeddod) ar gyfer trichinella. Os nad ydych chi'n magu moch mewn siediau dan reolaeth, yna mae'n rhaid i'r rhain hefyd gael eu profi cyn y gallant fynd i'r gadwyn bwyd i bobl.

Hunan-brofi a labordai hunan-brofi

Mae'r rheolau ar gyfer profi moch ar gyfer trichinella wedi'u nodi yn [rheoliad 2015/1375](#) yr UE a ddargedwir.

Mae safonau ynghlwm wrth siediau dan reolaeth fel rheoli plâu a storio bwyd anifeiliaid mewn modd diogel er mwyn lleihau'r risg o foch yn cael trichinella.

Mae cyfraith y DU yn caniatáu i'ch busnesau sefydlu labordy hunan-brofi. Mae hyn yn golygu y gallwch chi brofi'r moch eich hun i sicrhau nad oes ganddynt trichinella.

Fel lladd-dy hunan-brofi bydd gennych chi fwy o reolaeth dros yr amserlenni ar gyfer profion sydd fwyaf cyfleus i chi.

Gellir cynnal profion ar ddiwrnod y lladd. Os na cheir hyd i trichinella, gellir rhyddhau'r carcasau.

Gallwch chi sefydlu labordy yn eich lladd-dy ond bydd angen i chi dalu'r costau sefydlu a gweithredu.

Er mwyn sefydlu labordy hunan-brofi, mae'n rhaid i chi gymryd rhan mewn:

- hyfforddiant ar brofi ar gyfer trichinella, sy'n cael ei ddarparu gan y Labordy Cyfeirio Cenedlaethol (NRL) ar gyfer paraseitiaid
- ein cynllun Sicrhau Ansawdd

Gweler [Labordy Cyfeirio Cenedlaethol ar gyfer Trichinella ac Echinococcus](#) yr Asiantaeth Iechyd Anifeiliaid a Phlanhigion

Gwasanaethau profi (Cymru a Lloegr)

Ar gyfer busnesau yng Nghymru a Lloegr nad ydym wedi'u dynodi yn labordai hunan-brofi swyddogol, mae gennym ni labordy a all gynnal profion trichinella.

Rydym yn darparu'r gwasanaeth profi sy'n cynnwys y pecyn samplu a'r dosbarthwr ('courier') sydd ei angen er mwyn cludo samplau i'r labordy profi. Enw'r gwasanaeth hwn yw Cynllun Sicrhau Ansawdd yr Asiantaeth Safonau Bwyd (ASB).

Os nad yw'r moch i'w hallforio, byddwn ni'n talu am y canlynol:

- y dosbarthwr

- y pecyn samplu
- profi

Mae'n rhaid cadw carcasau'r moch hyd nes bod y prawf yn dangos nad oes trichinella ar y moch.

Gellir casglu samplau ar y diwrnod y mae'r mochyn yn cael ei ladd, os ydych yn cysylltu â'r gwasanaeth ymlaen llaw. Bydd y canlyniadau wedyn yn cael eu hanfon yn ôl erbyn 6pm y diwrnod canlynol.

Defnyddio labordai profi eraill

Gallwch chi ddefnyddio labordy hunan-brofi sy'n bodoli eisoes mewn lladd-dy arall ond bydd hwn yn drefniant preifat rhwng busnesau.

Bydd yn rhaid i'r Milfeddyg Swyddogol yn y lladd-dy hunan-brofi gytuno â hyn er mwyn sicrhau bod yr holl samplau yn cael eu cynnal a'u cadw a bod modd eu holrhain. Bydd y Milfeddyg Swyddogol hefyd yn gwirio bod cydymffurfiaeth â Chynllun Sicrhau Ansawdd yr ASB yn parhau.

Mae angen i'r dogfennau Gweithdrefn Weithredu Safonol (SOP) yn y ddau ladd-dy gynnwys yr wybodaeth hon.

Os ydych chi'n defnyddio labordy hunan-brofi arall, byddwch chi'n gyfrifol am ddarparu:

- y pecyn samplu
- cludo profion
- cost y profi

Gall lladd-dy hefyd sefydlu trefniant profi preifat gyda labordy profi arall sydd wedi'i achredu gan Wasanaeth Achredu'r Deyrnas Unedig (UKAS). Unwaith eto, byddwch chi'n gyfrifol am y canlynol:

- costau'r pecyn samplu
- cludo
- profi

Cymhorthdal ar gyfer profi (Cymru a Lloegr)

Byddwn ni'n rhoi cymhorthdal ar gyfer profion trichinella ar gyfer hychod a baeddod a moch nad ydynt wedi'u magu mewn siediau dan reolaeth os nad ydych yn defnyddio ein labordy profi dan gontract. Ni fyddwn yn rhoi cymhorthdal ar gyfer profion nad oes eu hangen yn y DU, fel profion ychwanegol a allai fod yn ofynnol ar gyfer allforio.

Ar gyfer labordy o fewn y lladd-dy, byddwn ni'n talu 60c fesul sampl a brofir ar gyfer eich anifeiliaid eich hun yn unig.

Pan fyddwch chi'n defnyddio labordy hunan-brofi sy'n bodoli eisoes mewn lladd-dy arall neu labordy achrededig UKAS, trefniant ariannol preifat rhwng eich busnesau yw hyn. Byddwn ni'n talu 60c fesul sampl a brofir i'r lladd-dy sy'n darparu'r samplau yn unig.

Os hoffech chi ragor o wybodaeth am unrhyw un o'r dewisiadau profi a ddarperir uchod ar gyfer Cymru a Lloegr, anfonwch e-bost at y [Tim Contractau a Chytundebau Lefel Gwasanaeth](#).

Gwasanaethau profi (Gogledd Iwerddon)

Ar gyfer busnesau yng Ngogledd Iwerddon nad yw'r ASB wedi'u dynodi yn labordai hunan-brofi swyddogol, gall y Sefydliad Bwyd-Amaeth a Biowyddorau (AFBI) gynnal profion trichinella.

Fel arall, gallwch drefnu cael samplau wedi'u profi mewn labordy hunan-brofi dynodedig swyddogol yn un o'r tri lladd-dy moch cymeradwy yng Ngogledd Iwerddon. Trefniant preifat rhyngoch chi a gweithredwr y lladd-dy fydd hwn.

Dylai unrhyw gostau sy'n gysylltiedig â samplu gael eu cytuno rhyngoch chi a gweithredwr y lladd-dy. Gallai'r rhain gynnwys

- y pecyn samplu
- cludo samplau
- cost y profi

Mae'n rhaid cadw carcasau a rhannau'r moch nes bod canlyniadau'r samplau yn dangos nad oes trichinella ar y moch.

Os hoffech chi ragor o wybodaeth am unrhyw un o'r dewisiadau profi a ddarperir uchod ar gyfer Gogledd Iwerddon, cysylltwch â NIOperationalPolicy@food.gov.uk.